

Laoch Spóirt



Buíochas le Sportsfile

**BHÍOS AR NEAMH
AG FÉACHAINT AR
FHATHAIGH NA
LINNE.**

Davy Fitzgerald

Le Liam de Lása

Is cuimhin liom go maith an chéad uair a leagas súil ar Davy Fitzgerald. Ní rabhas ach i mo ghasúr óg timpeall cúig bliana ach fós tá an pictiúr san greanta isteach i mo cheann. Bhíos fé dhraíocht ar fad ag a dhíocas, a fhonn catha agus a ghoil chun báire chomh luath is a phléasc sé amach as na seomraí feistis. Ar nós cú ar thóir ghiorria do thug sé fogha fíochmhar fén gcúl. An léasadh a thug sé don chamán ón gcuaille ar an dá thaobh sular sheol a leathbhádóir léagar urchair isteach ina threo.

Bhí m'athair ag maoirseoireacht ar an bpáirc na laethanta san agus tugadh an cúram domsa an sliotar a thabhairt thar n-ais go dtí an báireoir. Ba dheacair é sin a mhíniú do pháistí na laethanta seo. Sular tháinig laethanta na meán sóisialta chugainn níor mhair ár laochra i mórán cásanna ach ar scáileán an Domhnaigh amháin. Bhíos ar neamh ag féachaint ar fhathaigh na linne.

Má théimid siar go dtí laethanta a óige féin nochtann sé ina leabhar *Passion and Pride* eachtraí an tsaoil a mhúnlaigh é. Labhrann sé go hoscailte faoin mbulaíocht a deineadh air ar scoil agus an spreagadh a thug sé don ngasúr óg a fhís a fhíorú agus céimeanna Séamus Durak a leanúint i ngeansaí Chontae an Chláir. Díríonn sé ar iomaíocht an iománaí óig ag iarraidh briseadh isteach ar an bhfoireann ar dtús. D'éiríodh sé níos luaithe ná a chéile comhraic ar maidin agus théadh sé ag traenáil agus é ag dul thar bráid díreach le taispeáint dó nach raibh sé chun an lámh in uachtar a fháil air.

Ba thréimhse cheannródaíoch é na 90í san iomaíocht agus foireann an Chláir ag tuargaint ar an doras ó 1993 ar aghaidh. Chríochnaigh Davy le dhá bhonn uile-Éireann mar thoradh agus meas athchothaithe aige sa chontae. Is troime a luíonn ualach na staire ar fhoirne áirithe ach bhí na Cláirínigh meáite ar thalamh nua a bhriseadh. Chabhraigh sé go mór leo go raibh fear teasaí agus beomhar idir na cuailí agus é ullamh chun aon deis scórála a shlogadh roimhe.

D'athscríobh an fhoireann san scéal iománaíochta an Chláir agus bhí Davy áirithe i measc na bpríomhchumadóirí.

Ní fhanfadh sé díomhaoin riamh agus bheadh an carachtar fuinniúil, paiseanta le feiscint ar ár scáileáin go luath tar éis dó éirí as mar imreoir. Tháinig an glooch gan choinne nuair a d'fhág bainisteoir na nDéise a chúram i lár na craoibhe in 2008. Cloíodh go dona iad sa chéad bhabhta i gCraobh na Mumhan agus do bhí lucht camán an chontae in ísle brí dá bharr. Lean liútar éatar an ceapachán agus ba é an splanc é a bhí uathu ag an am. Léirigh sé a dhintiúirí mar bhainisteoir láithreach bonn nuair a stiúraigh sé an long go dtí an cluiche ceannais. Mo léan géar ní raibh i ndán dóibh in aghaidh na gCat ach an stánáil ba mhó dá bhfacthas riamh i gcluiche ceannais na hÉireann.

Bhí na créachtaí doimhin tar éis an lae úd gan dabht. Chomh doimhin san nach gcuirfinn an locht air dá mba rud é go dtug sé na cosa leis ón mbainistíocht ar feadh tamaill ina dhiaidh. Níor ghéill sé don treascairt agus clamhsán áfach agus chuaigh sé i mbun na hoibre atógála arís. Anois agus 12 bliain caite aige mar cheann feadhna ar fhoirne eadar-chontae agus é tar éis Corn Mhic Cárthaigh a bhuachaint lena chontae dúchais féin, Craobh na Mumhan a bhuachaint le Port Láirge i 2010 agus tréimhse réabhlóideach a chaitheamh le Loch Garman a mhaireann go fóil tá na honóracha go léir buaite aige.

Fonn Catha - Desire for battle
Urchair - Bullets
Maoirseoirseacht - Stewarding
Fathaigh - Giants
Mhúnlaigh - Moulded
Stánáil - Beating

Créachtaí - Wounds
Clamhsán - Complaining
Conspóid - Controversy
Draíocht - Magic
Mórtas - Pride
Treibh - Tribe



Buíochas le Sportsfile

Ní féidir scéal Davy a nochtadh i gceart ar ndóigh gan tagairt a dhéanamh don tsíor-chonspóid a leanann a shaol spóirt. Táid ann den tuairim go dtéann sé thar fóir lena chuid geáitsíochta ar an taobhlíne. Seans go dtéann ó am go chéile ach chaithfeá an sprid, teacht aniar agus misneach gan choinníoll atá go smior ann a mholadh.

Anois tá sé deimnithe ag lucht riartha na gcluichí nach mbeidh ár gcraobh againn an samhradh seo. Braithfidimid uainn go léir ó chroí an t-aicsean, an chaint, an chonspóid agus draíocht na craoibhe go deimhin, ach admhaím go mbraithfidh mé féin paisean agus mórtas Davy Fitzgerald go mór uaim agus é ag gríosadh a threibhe chun buachaint. Go gcífidimid é sin go luath.

Cúinne na bPáistí

Cuardach Focail

L	T	F	A	T	H	A	I	G	H	U	L	P	I
M	O	L	C	I	H	M	A	L	L	U	A	A	O
A	U	N	H	G	A	U	A	A	A	S	T	I	A
L	A	I	G	R	E	A	N	T	A	E	N	S	A
A	N	I	D	I	A	M	U	L	A	O	A	E	S
A	R	A	F	I	G	A	T	E	O	M	H	A	A
B	B	A	L	L	P	A	S	A	A	R	T	N	R
E	G	T	M	I	E	N	H	B	N	A	E	T	O
U	A	H	M	A	E	N	A	H	D	A	A	A	D
A	T	S	P	L	A	N	C	A	A	S	L	S	D
L	L	G	I	H	A	I	T	R	R	U	L	A	H
A	I	L	B	E	O	M	H	A	R	R	A	I	A
C	L	L	A	E	P	M	I	T	M	A	A	G	E
H	I	H	C	A	R	A	C	H	T	A	R	I	M

LEABHAR
SPLANC
CARACHTAR
MAIDIN
PAISEANTA
SEOMRA
TIMPEALL
GREANTA
LAETHANTA
LONG
DORAS
UALACH
FATHAIGH
ULLAMH
BEOMHAR
NEAMH